

Notas

Bao di ritmo di nos bon musica, adorno di stench, pluma y payet nos a celebra nos Carnaval # 53 en grande. Un tradicion cu aña pa aña ta creciendo mas y mas, y ta un parti di nos cultura tradicional cu no por falta. Laga nos repasa ariba e eventonan competitivo mas importante di Aruba su dushi y luhoso Carnaval.

Calypso y Roadmarch Infantil y Hubenil

Nos muchanan tambe a bria cu nan talento musical na Entertainment Center, caminda Aruba a conoce su reynan nobo di calypso y road march infantil y hubenil. Mighty Buddy, cu ta Jair Versprey a gana e corona infantil, mientras cu Biggie Boy, Jonathan Thiel, ta ganador di dos corona, esta calypso y road march hubenil y a gana e titulo tambe di cantante mas popular di e anochi. Esnan premia pa infantil tabata: Queen Char, Charella Lopes, cu a termina na di 2do lugar; Kid Dynamite Jr, cu ta Fakir Boelhoudt a termina na di 3er lugar; Queen Chanty, Chantal Quandt a bai cu e 4to lugar y Queen Gaby, cu ta Gabriela v.d. Biezen a bai cu e 5to lugar.

Tumba Contest

Esnan presente den Entertainment Center por a disfruta di un bon tumba contest, unda cu e sorpresa di anochi a resulta di ta Eugene Albetz cu a wordo acompaña pa e banda Di-Bo, a logra e corona di Rey di Tumba 2007. Un anochi caminda tabata tin hopi sorpresa. Un di esnan cu a hala hopi atencion y tabata tin hopi fans tambe tabata King Bottle, Alexander James cu a resulta di ta e tumba mas popular y e "tumba loco" di e anochi, pasobra el a pone tur hende canta, baila y move dushi cu su tumba.

Calypso y Roadmarch 2007

Te den oranan di mainta Aruba por a sera conoci cu e ganadornan di Calypso y Roadmarch 2007. Den un loc Laveist Ballpark completamente yen tur esnan presente tabata den ansa sperando pa sa ken ta e ganadornan, ya cu esaki ta e anochi unda cu ta kies loke lo rezona durante Aruba su carnaval. Mester bisa cu ta e prome biaha cu e contest a termina na e ora stipula. Ganadornan maximo di e anochi aki a resulta Mr. U-nique, Ronwayne Kock, cu a gana e corona di Calypso 2007 cu su cancion "Why Us". Ronwayne ta un participante cu a concursu pa prome biaha den Calypso y Roadmarch Contest grandi, pero ya tabata tin experiencia den e parti hubenil. E rey di Roadmarch 2007 a resulta di ta Caiso T. Samuel T. Phillips, cu su di cancion "Music".



Señora Carnaval

Un Club Caiqueto completamente yena di fans apoyando e 5 candidatanan cu a partisipa pa e corona di Señora Carnaval 2007, Joseline Henriquez, representante di Cable T.V. a bai cu e titulo, como tambe e titulo di Sra MAS y Best Speech. Como prome finalista a resulta Suzette Inesia-Krozendijk di T.O.B. Carnival Group cu tambe a bai cu e titulo di best show.

Reina Infantil

Entertainment Center e biaha aki no a conta cu un publico masal manera ta e custumber pa e evento di Reina Infantil, ya cu tabata tin 4 candidata so a participa pa e eleccion di e anochi ey. Cuatro princesita cu a haci un tremendo presentacion y a sa di haci e anochi hopi dificil pa e huradonan por a tuma un decision. Finalmente tabata Leeza Figaroa, representante di Wizz Kids, a bai cu e titulo maximo di Reina Infantil 2007, como tambe e titulo di MAS, best costume y best show. Reina di Grupo Champagne, Edimee Arends, a bai cu best speech y a bira e runner-up di e anochi aki.

Reina Hubenil

Entertainment Center a bolter di apoyo, blaas y confetti pa asina apoya 8 participante cu a competi pa e corona di Aruba su Reina Hubenil di Carnaval # 53. Un anochi unda cu tur cos a bai 'smooth' y a termina tambe na ora manera polis a stipula. Ocho show di kita sombre, unda cada candidata a duna un tremendo presentacion pa asina haci di e anochi aki uno super luhoso y dificil pa e panel di hurado.

Jo-nally Wever, representante di Champagne a logra hiba e titulo maximo di Reina Hubenil di Aruba su Carnaval, como tambe e premio di mihor trahe, mihor show y esun di mas popular di e anochi aki. E 2do lugar a bai pa Lynette do Nascimento, representante di Youth Chaz Carnival Queen, y e di tres a bai pa Charella Lopez, representante di T.O.B., kende tambe a keda corona como queen of mas.

Reina Grandi

E anochi cu mas Aruba lo recorda pa carnaval 53 ta e eleccion di Reina Grandi, unda huradonan internacional y local tabata tin e tarea di eligi e reina nobo di carnaval. Un anochi cu hopi luho y color, cu un Entertainment Center completamente yen, y contando cu participacion di 8 candidata, cada uno cu un tremendo show y bistiman di luho. Un anochi cu a conclui cu e resultado aki: Cristina Trejo, Reina di Carnaval #53, Focus Queen look, reina di MAS, y Best Costume. Candidata mas popular y 1e finalista tabata Glendeline Maduro di Marriott Hotel. Paola Adamus di Champagne a bai cu Best Speech y 2do finalista. Mior show a bai pa Marilyn Croes, representante di Santa Cruz. Ya ta di 2 biaha awor cu Cristina Trejo ta conquista corona di reina di carnaval. Na 2003 el a bai cu e titulo di Reina Hubenil.